

TEXTE

I

Ir'e dolors s'es dins mon cor asseza
 Si qu'a per pauc no m'auci demanes,
 O meta jos la crotz qu'avi preza
 A la honor d'aquel qu'en crotz fo mes ;
 5 Cor crotz ni lei no'm val ni guia
 Contr'als fels Turcs, cui Dieus maldia ;
 Anz es semblans, segon qu'hom pot vezer,
 C'al dan de nos los vol Dieus mantener.

II

Al primier saut, an Cesaria conqueza
 10 E'l fort castel d'Alsuf per forza pres.
 Ai ! Senher Dieus, e qual via an preza
 Tan cavalier, tan sirven, tan borzes
 Que dinz los murs d'Alsuf avia ?
 Ailas ! lo regne de Suria
 15 N'a tant perdut, qui'n vol dir lo ver,
 Per tostems mais n'er mermatz de poder !

III

Doncs, ben es fols qui a Turcs mou conteza
 Pois Ihesus Christs non lor contrasta res ;
 Qu'il an vencut e venzon, de que'm peza,
 20 Francs et Tartres, Ermenis e Perses,
 E nos venzon sai chascun dia,
 Car Dieus dorm, qui veillar solia,
 E Bafometz obra de son poder
 E fai obrar lo Melicadefer.

IV

25 No m'es semblan que per tan se recreza,
 Anz a jurat e dit tot a pales
 Que ja nuls hom que en Jhesu Crist creza
 Non remandra, s'el pot, en est pacs.
 Enans fara bafomaria
 30 Del mostier de Sancta Maria.
 E pus son Fils, que'n degra dol aver
 O vol n'el plaz, ben deu a nos plazer.

V

Lo papa fai de perdon gran largueza
 Contr'als Lombartz, a Carl'e als Frances
 35 E sai, ves nos, en mostra gran cobeza,
 Que nostras crotz perdona per tornes.
 E qui vol camjar romaria
 Per la guerra de Lombardia
 Nostre legatz lor en dara poder,
 40 Qu'il vendon Dieu e'l perdon per aver.

VI

Senhors Frances, Alexandria
 Vos a piegz fag que Lombardia
 Que sai nos an Turc sobraz de poder,
 Pres e vencutz e donatz per aver.
